

Tur hende paga bon tino:

TIN DENGUE NA ARUBA

ORANJESTAD(AAN) -- Net den e temporada di carnaval caminda tur hende lo kier pasa ratonan agradable celebrando nos carnaval, mester tuma medidanan necesario pa evita cu bo lo pasa e temporada malo na cama cu Dengue.

Despues di un temporada basta largo di yobida, Aruba

a keda invadi pa sangura. Apesar cu a cuminsa fuminga, esaki no tabata suficiente ya cu den mondi tambe ta crea criadero di sangura y

esakinan ta bay zonanan habita. Sangura no solamente ta causa hopi molester cada vez cu e pica, sino ta sumamente peligroso pasobra e ta

un di e formanan pa transmiti malesa.

Na luna di december 1999, Departamento di Salud Publico a duna informacion pa tur hende paga tino y tuma e precaucionnan pa elimina criadero di sangura. Door di elimina criadero di sangura ta caba cu e posibilidad di e

malesa Dengue.

Sin embargo a registra varios caso di Dengue riba nos isla. Ta asina cu ora cu ta sospecha cu un persona tin Dengue ta tuma e muestra di sanger pa haci un test y ta unicamente cu e test por confirma si un persona tin Dengue of no.

Comunidad mester ta conciente cu unavez cu e virus ta presente e por plama si cada un di nos no tuma precaucion. E precaucion simplemente ta cu mester caba cu criadero, e sangura cu ta transmiti e virus di Dengue ta broei rond y paden di cas den cualkier cos cu ta contene awa.

Cada un di nos mester colabra den preveni mas caso di Dengue.

Ta asina cu Venezuela ta den un estado di alerta pa e situacion di Dengue aya. Segun e director di Epidemiologia na Venezuela, e situacion di Dengue na e pais lo keda asina algun luna mas. E epidemia di Dengue ta concentra den estadonan Zulia y Falcon.

Otro pais cu tambe ta combatiendo Dengue fuerte ta Surinam. For di November e pais aki a registra un aumento di casonan di Dengue na hospitalnan.

E unico manera di baha e transmission di e virus di Dengue ta controlando e sangura cu ta transmiti e malesa o sea evita criadero di sangura rond di bo cas, paden di bo cas y den vecindario di bo cas. Tanto bal cu den bo cura no tin nada cu ta contene awa y den cura di bisiña of den mondi ey banda mes tin tire of blekinan bieu cu awa.

Departamento di Salud Publico ta pidi cooperacion di un y tur pa yuda den combatiendo Dengue. Controla bo cas paden y pafor den cura, no laga nada para cu awa den cura, laba tur baki cu tin awa para aden bon specialmente e randnan. Planta mata cu ta den awa, den tera. Pone screen na bentana y porta si ta posibel. No laga muchanan cana sin paña. Hunta parti di curpa cu no tin paña cu repelente y ripiti esaki cada 4 ora.

Lectornan kier sa:

CUAL POLIS AWOR TA PAPIA BERDAD

ORANJESTAD (AAN): E prome biaha cu e informe a sali den DIARIO, por a lesa con un oficial halto di Polis ta indica cu e motibo pakico a pasa e ley contra tinted-glass di auto, ta pa evita criminalidad.

Sin embargo un otro agente policial despues a papia na TV, indicando cu e ley contra tinted-glass principalmente ta pa evita desgracia di auto.

Pero pa sorpresa di tur hende, e siman aki atrobe un agente policial ta bisa cu e ley a bin na vigor, pa combati criminalidad.

Lectornan awor kier sa: Ta cual Polis ta papiando berdad? Lectornan kier tende tambe di Parlamentarionan kico e argumento ta cu a pasa e ley aki.

Hecho ta cu posiblemente

riba Diamars 15 di Februari 2000, Polis lo cuminsa controla esnan cu ainda tin tinted windshield, como tambe glasnan dilanti na banda tinted.


Den un combersacion recientemente cu un Politico, el a indica na DIARIO cu ora bo kier introduci un ley na Aruba contra algo cu pa añanan largo a worde acepta caba y tolera... anto bo mester bin cu argumentonan sumamente

fuerte pa acepta e ley ey.

Kico e argumentonan fuerte ta? Te aworaki nan ta masha debil.

Algun hende kier pa a consulta cu pueblo prome pa mira kico e deseo ta. Ademas tin algun cu ta convenci, cu awor si criminalnan lo no bay comete nan fechoria mas den dia, sino mas bien den anochi. E ora ta bay bira mas dificil pa Polis haci nan trabao tambe!

PUEBLO NO TA KENS!!



Santo Rosario na capel di Alto Vista

ORANJESTAD (AAN): Un invitacion ta bay na pueblo pa Diadomingo 30 di Januari 2000, pa 5'or di atardi acudi na Capel di Alto Vista pa un Santo Rosario cu musica y canto cu ta doble oracion. Uni manera ruman nos ta bay gradici mama di Alto Vista pa tur loke nos ta haya tur dia y sigui pidie pa intercede pa problemanan familiar, vicio, adiccion, luto y enfermedad.

Tambe pa muchanan cu ta worde usa y maltrata. Pa tur difunto, esnan cu a muri recientemente.

Ban muestra nos mama gratitud y hacie contento, maske ta un rato y asina haya forza, fe, y speranza, paz den nos curazon, curadhi den tur lucha y problema.